



Wysoke wuznamjenjenje Serbomaj, kotraž staj načasnemu serbskemu kubljanju puć rubałoj: Jan Bart (nalěwo) a Ludmila Budarjowa hromadže ze sakskim ministerskim prezidentom Michaelom Kretschmerom (CDU). Foto: Jürgen Männel

Myto za Witaj w statnej kencliji

Zwjazkowy zaslužbny rjad Ludmili Budarjowej a Janej Bartej spožčili

Drježdźany (SN/mb). Njeličomne zarjadowanja je Ludmila Budarjowa organizowała. Wčera pak je so wjeseliła, zo smědžeše bjez swójskeje prócy přitomna być, kaž Serbskim Nowinam praješe. Hromadže ze synom Janom, přichodnej džowku Madlenku a z wnučkomaj Filipom a Kitom poda so do sakskeje statnej kenclije w Drježdźanach. Swójbna skupinka běše zdobom rjany dopokaz za posrědkowanje maćeršćiny přichodnymaj generacijomaj. W statnej kencliji je ministerski prezident Michael Kretschmer (CDU) jej a Janej Bartej w nadawku zwjazkowego prezidenta zwjazkowy zaslužbny rjad spožčil. Budarjowej, dokoelž „so zaměrnje a rozhladniwje za dwurěčne kubljanje wot pěstowarnje hač do uniwersity zasađžowaše“, kaž wopisuja jeje „angažement za zachowanje serbšćiny přez wjele lět“, mjenz druhim jako založenska člonka a předsydka Serbskeho šulskeho towarstwa (SŠT).

91lětny Jan Bart je, kaž statna kenclija wuzběhny, „iniciator a směrodajnje za-

mołwity za model Witaj, kotryž hižo małym džěcom zmóžnja, sej znajomosće serbšćiny na maćernorěčnym niwowje zdobywać.“ Modelowy projekt, kotryž „staj wón a sobuwojowarka Ludmila Budarjowa zahibałoj“, je „ważny zakładny kamjeń za zachowanje serbšćiny“.

Jan Bart je sej hromadže ze zastupjerku Rěčneho centruma Witaj (RCW), Michaelu Hrjehorjowej, předsydku SŠT, Katharinu Jurkowej, a Dawidom Statnikom, předsydu Domowiny, do Drježdźan dojeł. Tule mytowaše ministerski prezident nimo Barta a Budarjowej štyri dalše wosobiny ze Sakskeje. We wosobinskej lawdaciji je so kóždemu přiwobročil. Serbow chwaleše za wuprudženje na młodych ludźi, při tym mjenowaše serbšćinu „kulturne kublo Sakskeje“. Wšěm šesćom piše Kretschmer w zdžělence statnej kenclije: „Sće wjele za naš kraj činili. Sće so na wobdźiwajnje wašnje za druhich zasađžowali a wažnym wěckam puć rubali. Waš angažement je přikladny.“

Dawid Statnik skedźbni w pisomnej

gratulaciji na wjac hač 60 přednoškow za wjac hač 1 100 zajimcow, z kotrymiž je Bart ludžom koncept Witaj hromadže z jednaćelom SŠT a pozdžišim šefom RCW Rafaelom Wowčerjom zblížil. Jemu poboku běše tehdyša předsydka SŠT Ludmila Budarjowa. Jeje skutkowanje w SŠT ma Statnik za „znamjo, zo je towarstwowe hibanje Serbow wažny element, swój přichod wuhotować.“

Što sej lawreataj přejetaj? Jan Bart wočakuje tež wot našeho wječornika, zo zasoj wjac wo praktiskim wšědnym dźěle po koncepcje Witaj rozprawjamy. Najwjetši problem widži Bart w přechodže wot pěstowarnje do šule. To w Francoskej lěpje funguje, hdžež wobhladauja pěstowarnju („předšulu“) a zakladnu šulu jako jednotu. Ludmila Budarjowa přeje sej sebjewědomje serbowacu młodzinu a pěstowanje žiweje serbšćiny tež w přichodže. Jeniče w sydow Witaj-pěstowarnjach w nošerstwje SŠT wuknje wob lěto na 520 džěci po principje imersije – wšědnej kupjeli w serbšćinje.